

## Document pertuccont l'aua da Londadusa

da Tarcisi Hendry

Il document

Enzatgei davart las persunas el document da 1368

Acts originals tenor pader Baseli Berther

Notizias e remarclas

Las persunas el document

Pertucca il document dall'aua Londadusa da Vic Hendry

Nies archiv communal cumpeggia ina fetg biala retscha da documents historics d' avon 1800. Buca meins che 51 document dattan perdetga d'ina viva ed activa historia tras plirs tschentaners. Quels documents ein essenzials el giudicament dil svilup historic ed economic enteifer las scheinas communalas. Pil pli tractan els da caussas dallas alps, il bia da cumpras, venditas mo era da dispetas e malaveglias pertuccont ils tscheins, ils cunfins ed auter.

In da quels documents cun ina tut speciala historia e cuntegn lessel presentar oz a vus. La scripziun haiel per levgiar il capir actualisau.

*A Tut quels che vesan ni audan e legian questa brev seigiein nus cheu numnai, Peter vivens e Gion, fargliuns legitims, fegls da Gion Padrutt da buna memoria, nativs da Tujetsch e vischins da Camischolas sura, da saver e confessein aviartamein cun questa brev ton per nus, sco per nos artavels vegnentsuenter, qualmein nus havein giu dispeta cun ils undreivels vischins da Florin sut e Florin sura, ils quals han funs enta Florin sura vid il dutg u flum che cuora dadora la baselgia giu, davart l'aua che vegn giu la Val da Londadusa; cheu ei stau anflau cun verdad, e cun engirau serrament, sco era cun aviart dretg e giustia a Mustér, sut la glienda, che nus numnai frars, nos artavels, e nos vegnentsuenter, sche nus essan morts, haveien negins dretgs tier la avon numnada aua davart il funs che nus havein enten Camischolas sura; tuccont tier aber ils vischins da Florin sut, e Florin sura ch'ei sesents oradem il vitg han cun dretga raschun avon tuts auters buns dretgs, e negin auter sin tiara; ei sesafla era cun la sezza raschun e dretg, ch'els numnai vischins da Florin sut dueigien haver part da quella aua ton sco els han da basegns per lur casas e per lur biestgam, buca aber pli che lur basegns a buna fei, senza malart.*

*Nus numnai frars havein era scret quei cun lubientscha, cun saver, e veglia dil venerabel sgr. avat Johannes e dil Junker Heinrich de Pontaningen da gliez temps ugau dalla claustra da Mustér; e per ina ferma e perpetna segironza da tuttas quellas caussas, che stattan cheu screttas, havein nus cun tutta detschartadad rugau nies grazius signur avat Johannes, ed era il numnau ugau, il qual ei era sesius a dretg sut la glienda davart las numnadas caussas e pugns, ch'els omis dus pendessien aviartamein lur sigils vid questa brev; che quei seigi tut daventau cun nossa veglia e saver e tras detschartamein rugar dils numnai treis frars, havein nus avat Johannes pendiu nies agen sigil aviartamein vid questa brev, la quala ei scretta a Mustér sin la vigelgia da S.Martin, gl'onn suenter la naschientscha da Niessegner tredischtschien a sissonta otg.*

*Da quei eran perdetgas Junker Christophel de Rinckenberg, Junker Ulrich de Pontaningen, Ulrich de Barlodt da gliez temps mistral da Disentis, Gion Burgli hügli da Camischolas, Rudolph de Rieffen, Heinrich de Saliangen et auters undreivels vischins dalla Casa da Diu biars e detgavunda.*

Quei prezios document datescha digl onn 1368. Deplorablamein eis el buca en original avon maun. El cumpeggia ina part d'in document digl onn 1517. Grazia alla lavur historica da pader Baseli Berther, che ha scret giu quei document igl onn 1908, ei il verbal da quel aunc avon maun. Ina copia da quei prezios document fuva el possess da Vigeli Riedi da Zarcuns possessur dalla acla a Flurin Sut. Plinavon ei il lungatg original segiramein staus tudestg. Da cu la translaziun en romontsch deriva ei grev da giudicar.

Il document da 1368 rugalescha ils dretgs dalla aua da Londadusa pils habitonts da Flurin Sura e Sut. Dad ordvart gronda muntada per la historia tuatschina ei la suandonta remarca ella brev: „han funs enta Florin Sura vid il dutg u flum che cuora dadora la baselgia giu,“. In clar mussament dalla

esistenza d'ina baselgia, carteivel caplutta, a Flurin Sura. Ei sa tgunsch settractar dalla emprema caplutta dadens il dutg grond ei gie l'emprema caplutta da Rueras vegnida benedida per igl onn 1491. Forsa ina succesura da quella da Flurin Sura.

Da quei temps ei ina bova vegnida giu da Londadusa, ni ella vischinonza da quella. Igl onn 1517 cumparan plirs vischins da Camischolas Sura e Flurin Sut e Sura avon dertgira a Mustér per far valer lur dretgs pertuccont l'aua. Ins sefundescha en quella sin la veglia brev da 1368. Dil temps da quella dispeta fuva Duri Berchter mistral dalla Cadi (1517). El sez e siu frar Gion Berchter, salter (cassier) da vischnaunca fuvan era cumpigliai en quella dispeta.

Quella brev, ni l'aua da Londadusa ha pari adina puspei giu sias dispetas denter vischins. Aschia vegn la sura brev da 1368 e la cunvegrientscha da 1517 danovamein confirmada entras il cumin dalla Cadi igl onn 1664. Aschia ei la decisiun da 1517 vegnida slargada cun la suandonta remarca:

*E schinavon che questa brev entras lieherlihedat ei buca stada observada, ed ida anavos, sche han omisduas parts, ed interessai cun cunsentiment e lubientscha d' in lud. Oberkeit da Disentis garegiau da mei Conradin de Medell, da gliez temps Landschreiber da Disentis, ed era Bunds-Schreiber della lud. Ligia Grischa, che jeu dueigi copiar, e scriver giu danovamein; ed aschia confessel jeu numnau Landschreiber per miu serrament, che questa brev seigi scretta giu, e confruntada da plaid a plaid, cun il ver original, u brev veglia, che haveva aunc si perfetgamein il sigil dil Cumin e concordava en tut e pertut cun quest. Per perdetga da quei ha il lud. Oberkeit de Disentis tras rugar dad omisduas parts schau metter da niev si il sigill dil cumin vid questa brev gl' onn 1664 gl'emprem da zercladur.*

Mistral Gion Cristian Venzin, mistral ils onns 1818/19, pretenda igl onn 1834 ina attestaziun e certificaziun dil document da 1517/1664. Forsa ei l'aua da Londadusa ina gada dapli stada in cass da malaveglias denter vischins e possessurs dallas aclas da Flurin. Aschia siara la brev cun la suandonta remarca:

*Muster, ils 28 da november 1834. Sin rugar de sgr. mistral Venzin Gion Chrest, da Tujetsch vegn ei per enconuschietscha dil lud. Oberkeit, cun consentiment dils sgrs. geraus Gion Chrest Mon e Gion Andriu Berther da Tujetsch, attestau e certificau che la sura copia seigi da plaid en plaid conforma ad in outra copia mess avon al lud. Oberkeit. Pet. Anton de Latour, sco buntsstatthalter*

### **Enzatgei davart las personas el document da 1368**

Peter vivens e Gion fargliuns fegls da Gion Padrutt, nativs da Tujetsch ein vischins da Camischolas sura.

Avat Johannes ei vegnius eligius avat suenter igl assassinat dad avat Jakob Buchhorn igl onn 1367. En uffeci eis el staus tochen 1401. Successur ei il Tujetschin Pieder de Pultengia daventaus avat da 1402 - 1438. Avat Johannes II da Glion ha buca giu lev suenter igl assassinat da siu antecessur. Denton sco migeivel avat ha el dau dapli libertads al pievel cumin. Era Tujetsch ha profitau da quei generus avat ed ein secumprai ora igl onn 1390 dalla grevezia dil tscheins fier sin nuorsas. 1391 decidan els schizun da surdar a negins jasters dretgs sin las alps tujetschinas; quei oravontut per demonstrar fermezia ed autonomia.

Da quei temps cumparan per l'emprema ga ils mistrals dalla Cadi. La liberalisaziun dad avat Johannes ha possibilitau in svilup democratic en nosssa regiun. Tochen ussa vegneva Dominus Petrus da Cavorga numnau sco empren mistral enconuscent dalla Cadi igl onn 1371. **Il sura document da 1368 pretenda en quei grau ina midada historica.** Il document plaida gia d'in mistral e quei en la persuna da Ulrich Barlotd (Barlotta). Interessant ei ch'igl empren mistral deriva buca ord las famiglias noblas da gliez temps. Aschia per semeglia ord las famiglias de Putnengia, de Pheisel ni Ringgenberg. Egl Uri existeva igl uffeci da mistral gia varga 100 onns, dapi 1273. El Grischun per dapi la secunda mesadad dil 14avel tschentaner: 1362 Rheinwald e Safien, 1363 Ursera, 1375 Sursaiassa.

Junker Ulrich de Pontaningen, Putnengia, fuva da gliez temps ugau (Burgvogt, Talrichter) dalla claustra da Mustér per Tujetsch e habitava el casti da Putnengia. 1363 cumpara Ulrich de Putnengia

sco mistral dad Ursera.

La finiziun -ingen tradescha la derivonza tudestga. Carteivel ei quella famiglia derivonta dil Valleis ed ei entras beinstonza s'avanzada agl uffeci dad administratur per la claustra da Mustér. Entuorn 1200 eregian els lur habitadi en fuorma d'in casti a Putnengia. La schlatteina cumpara era ella fuorma Bultingen, Bultringen, Pultingen, Puntningen, Pultiringen e Pultinger. Documentada vegn quella famiglia l'emprema gada 1252: Wilhelmus, miles de Bultiningen. In document da 1285 confirmescha els sco ministerials dalla claustra per Tujetsch: de Tivez ministeriales, dominus Hugo, miles de Pultaningen, Wilhelmus frater suus. La pli gronda influenza politica han els giu el 13 e 14avel tschentaner, quei en Tujetsch, ad Ursera ed ella Cadi. La pli impurtonta persuna ei avat Pieder da Putnengia staus, avat dils 1402- 1438.

Junker Christophel de Rinkenbergh

Ils da Ringenberg derivan dil vitg bernes Ringgenwil. Entuorn la mesadad dil 13avel tschentaner arrivan els en nossa tiara ed eregian il casti sur Zignau. L'emprema ga cumpara Rudolf von Ringenberg en in document da 1283.

Gion Burgli hügli de Chamischollas

vischin da Camischolas cun derivonza gualsra.

Rudolph de Rieffen

da Rueras, pli da vegl era Ryferis ni Ryfares. En in document da 1380 cumpara in Rudolf von Reveres; carteivel ei quei la medema persuna.

Ils de Pultengia ed ils de Rueras ein stai ils sulets enconuschents signurs dil temps feudal en Tujetsch. Els vegnevan titulai sco Junkers, dil plaid tudestg Jungherr! Ils signurs de Rueras han buca giu aschi gronda influenza sco ils signurs dil casti vischinont. Aschia cumpara sulettamein in mistral Martin de Ryfären igl onn 1399.

Heinrich de Saliangen

Il document original savess dar dapli sclariment davart la scripziun da quei num. Tgunsch secloma quei plitost de Salvanigs e sereferescha sin derivonts da Selva, era numnau Sulvanix ni Selvaningen.

Vus veseis pia; sin fundament dad in sempel document, tgei quel sa tut raquintar a nus da temps vargai, da nos antenats e lur cunfar. Forsa haveis a casa era aunc ina u l'autra scartira veglia, carteivel buca aschi veglia sco la sura, denton era quellas vegnan aunc pli veglias e dattan perdetga dad interessants eveniments daditg vargai. Igl archiv communal, ch'ei gie cheu per nus tuts, pren bugen encunter da quei scartiram avon che dismetter quellas per maina veser. Forsa existan aunc enzanua las copias da quei vegl document, plaida gie quel alla fin da duas copias existentas. Quei fuss per nies archiv communal in enrihament zun prezius.

## Acts originals tenor pader Baseli Berther

### **Davart ils dretgs per l'aua de Londadusa, dil dutg grond, che dei flessegia a Florin-sut.**

Jau Mistral Durig Berchter da quei temps Lantmann della Cadi confessel aviartameing, e fetsch de saver a scadin con questa breff, che sco sin oz, sco il datum de questa breff muossa, en compary avont mei, et in aviarta Dertgira, enten quei che jau seseval a Dreig â Musté enten la stiva gronda della Dertgira, ils Hondreivels Gion Berchter Saltèr de Tujetsch, e Gion Martin Laniascha per sesez, a per sia vogadia con lur Massedurs Plaisch Bundi concedius ad els con Dreig, ei han plonschiu enconter Gielli Ortschei, Gion Janin, Gion Heyni, e Gion Salya; Gion Berchter davart Florin Sura, e Florin Sutt, e Gion Martin davart Florin Sutt, qualmeing els hagian manau sin lur furs l'aua, che flesseigi ord la Wall Landadusa, dil qual ne els, ne lur vignir suenter hagian dreigs, ne vegnien mai a survignir dreits suenter mussament d'ina bref de sentenza, la qualla ei stada mess' avont adina Dertgira, e garegiau, ch'ella deigi vignir legida. Sin quei ha garegiau il nomnau Derschader de star si e de metter in auter en siu stailg, pertgei che Gion Berchter fuss siu frà, e plonschess davart quell'aua, dalla qualla el havess era dreitgs; et ha schentau a Dreitg: „cau ei stau sententiau, che schinavont ch'el hagi era dreitgs,

nomnadameing davart Florin Sura, deigi el haver stgisa de star si, et ent siu Nom deigi Gion Wenzut da glez tems Saltèr de Musté sèrr ent sco Derschader.

Sin quei garegia il nomnau Gion Berchter puspei, che la bref vegni legida si, la qualla suenter in Umbfrag faitg de mei nomnau Derschader ei con sentenza stada enconoschida de tethlar; Suentèr quei han ils nomnaus garegiau tras lur Messadur, ch'in Dreschader les truar ad els, ch'ell'aua podessi flessigliar, e cuorer sco daveilg, e suenter dir della sententia, ner aber responder pertgiei els veglien quei buca schar? Cau ei stau avont Dreitg Gielli Ortschei e Gion Janin con lur Messadur Pedrut Jenet da gliez temps Banner-Meister, manegiont che la bref fuss memia veglia, e che doves portar nagin donn ad' els; pertgiei che ditg suenter quei seigi ju giu ina bova, ch'els haigien patiu ton e pli gron donn, ch'els: l'aua seigi era mai manada, ne dovrada outra visa, pertgiei che davont temps seigi ei stau in frust prau d'in num Florin-Sura, e Chamischollas Sura; par quei manegien ei bein d'haver dreitgs; per quei han ei se offeriu, et era garegiau de schar vignir sin la Uaitgia, e sin quei han ei schau schentar a Dreitg, sch'ei possien haver la Uaitgia, ner tgei che dreitg fussi, et ei stau enconoschiu, ch'ei possien haver la Uaitgia, e deien per quella gada haver respondiù, ressalvont sche la contrapart vignies a ciunchar giu: Sin quei han ils vivont nomnai tras lur Messadur replicau, che la Fonatuna che surveschi a Florin Sura et Sutt, seigi lunsch plin giu, che nua che la bova seigi rott'ora; et con quei han è manegiau de metter giu l'Uaitgia, e de restar tier lur Sententia veglia, il qual ei bucca daventau, sonder cun sententia e schau enconoschiu, e schau tier l'Uaitgia, e schi bauld sco ei seigi commoditat agli nomnau Derschader et Oberkeit et el vegni a vignir avisaus, et era ch'ils nomnai Gion Berchter haigien faitg kundt e de saver agli contrapart, che domischduas pars possien vegnir con perdetgias e brefs, sco els manegien d'haver e sin quei sche hai jau nomnau Derschader tras lur aviis clamau tut gl'Oberkeit de vignir con els sin l'Uaitgia, e lau sessy a Dreig muort lur domendar, et muort il Dreig, ner Giustia, e pi il Mistral Durig Berchter ha priu stgisa, et ei staus si, e mess en siu stailg, et auctoritat il nomnau Derschader Gion Wenzut; avont il qual et ina entira Dertgira een compary cun lur Messadurs ils vivont nomnai, et han domischduas parts garegiau de muossar las stuschonzas, e nua la bova seigi rutt' ora, e nua l'aua neschi; cau ei stau con sententia enconoschiu, ch'il ploing avont mussar, e lau suenter possi era la contrapart mussar, in' e lautra part schi ditg sco ei veglien con tuta lur pleina, e buna satisfactiun; Sin quei sun jau nomnau Derschader con ils giraus jus si tier la fontauna nua ch'ella nescha, et era mirau nua la bova seigi ida giu, e puspei suenter l'aua toccan giu dim, e suenter quei che scadina partida ha giu mussau suenter lur bienplascher e satisfactiun, lura sun jau nomnau Derschader puspei sesius a Dreig sur la Strada denter Florin Sura e Florin Sutt, nua che domischduas parts en stadas enten contradictorio manegiont scadina d'haver raschun; cau han garegiau ils savens nomnai Gion Berchter, Mistral Durig e Gion Martin de tetlar las pardeggias, il qual la part contraria ha bucca voliu schar tier, aber la Dertgira ha tatlau quellas; Suentèr quei han domischduas parts schentau a Dreig: Sin quei ha jau nomnau Derschader emparau entuorn per il Serament, e suenter gl' umbfrag ei stau sententiau einhellig, qualmeing ei sesaflì con paretgias, che cur ch' ei crudi malas auras, sche vomien ils nomnai Gielli, e Gion si et endrizeschan l'aua anèn viarz ent' il dreig dûug, adero enten il dûug pli giu dim, che va per la plauncha da maun saniester cur ch'in va ensi, lau si eis ei ils funs de Chamischollas sura, et han nagin dreitg tier l'aua, schi pauc sco ils dûugs dadora; e tier quei laien ei esser etc. E la bref veglia laschein nus esser enten sia vertit e Kraft la quala plaيدا aschia:

A Tuts quels che vesan ner auden legien questa bref segiein nus cau nomnai, Peter vivens e Gion fargliuns legitims fegls de Gion Padrutt da buna memoria, natifs de Tujetsch e Vischins da Chamischollas Sura, de saver e confessein aviartameing con questa bref ton per nus, sco per nos Artavels vegnient Suentèr qualmeing nus havein giu dispetta con ils hondreivels vischins de Florin sutt e Florin Sura, ils quals han funs ent Florin sura vid il dutg u flux che cuorra dadora la baselgia giu, davart l'aua che veing giud la vall de Landadusa; cau ei stau enflau con verdat, e con engirau serament, sco era con aviert Dreitg et giustia a Musté, sutt la Glienda, che nus nomnai frars, nos artavels, è nos vignir suenter, sche nus essen morts, haveigien nagins Dreigs tier la vivont nomnada aua davart il funs che nus havein enten Chamischollas sura; tuccont tier aber ils Vischins de Florin sutt, e Florin sura ch'en sessents ora dim il vitg han con dreitgia raschun avont tuts auters buns Dreigs, e nagin auter sin tiarra; ei sesafla era con la seza raschun, a Dreig, ch'ils nomnaus vischins de Florin sutt deigien haver part da quella aua ton sco els han de baseings per lur casas e per lur biestgiam, bucca aber pli che lur baseings a buna fei, senza malard etc.

Nus nomnai frars havein era scrit quei con lubienschas, con saver, e veglia digl venerabel Sgr. Avad Johannes, e dilg Junker Heinrich de Pontaningen da gliez temps vugau della Claustra de Musté; e per ina ferma e perpetna Sigironza de tutas quellas caussas, che staten cau scritas, havein nus con tuta deciartadat rogau nies gratius Segniur Avat Johannes, et era il nomnau vugau, il qual ei era sesius a dreig sut la Glienda davart las nomnadas caussas e puings, ch'els domischdus pendessen aviartameing lur sigils vid questa bref; che quei seigi tut daventau con nossa veglia e saver e tras deciartameing rogau dilgs nomnai treis frars, havein Nus Avad Johannes pendiu Nies agien sigill aviartameing vid questa bref, la qualla ei scritta a Musté sin la Vigieltgia de S. Martin, gl' onn suenter la neschienschas de Nies Segnier tredischtschient a sisonta otg.

Da quei eran paretgias Junker Christophel de Rinckenberg, Junker Ulrich de Pontaningen, Ulrich de Barlotd da gliez temps Mistral de Disentis, Gion Burgli hügli de Chamischollas, Rudolph de Rieffen, Heinrich de Saliangen et auters hondreivels vischins dela Casa da Diu biars et deiggia avonda etc.

Da quella sententia han ils nomnai Gion Berchter, Mistral Durig e Gion Martin domendau ina testimonianza suenter il Dreig, la qualla suenter haver domendau entuorn da mei Derschader ei stada tras sententia enconischida de dar il Sigill dilg Cumin etc. E per vera perdetgia de tut quei ei confirmau e pendiu aviartameing il Sigill de Nies Cumin vid questa bref, la qualla ei dada ent' il Mainz de Zercladur gl' onn suenter la Neschienschas de Christi nies char Segner 1517.

E schinavont che questa bref entras lieherlihedat ei buca stada observada, et ida anavos, sch' an domischduas pars, et Interassas con consentiment e Lubienscha d' in Lud Oberkeit de Disentis garegiau da mei Conradin de Medell, da gliez temps Landschreiber de Disentis, et era Bunds-Schreiber della Lud Ligia Grischa, che jau deigi copiar, e scriver giu denovameing; et aschia confess jau nomnau Landschreiber per miu Serament, che questa bref seigi scretta giu, e confrontada de plaid a plaid, con il ver Original, u bref veglia, che haveva eung si perfetgiamein il Sigill dil Cumin e concordava en tut e pertut con quest: Per perdetgia da quei ha il Lud Oberkeit de Disentis tras rogar de domischduas parts schau metter daniefen si il Sigill dil Cumin vid questa bref Gl' onn 1664 gl' εμπrem de Zercladur. Muster, ils 28 da november 1834. Sin rogar de Sgr. Mistral Venzin Gion Chrest, da Tujetsch vegn ei per Enconoschiescha dil lud. Oberkeit, cun consentiment dils Sgrs. Gieraus Gion Chrest Mon e Gion Andriu Berther de Tujetsch, attestau e certificau che la sura Copia seigi da Plaid en Plaid conforma ad in outra Copia mess avon al lud. Oberkeit.

Pet. Anton de Latour, sco buntsstatthalter

### **Notizias e remarcas**

La sura scartira „Davart ils dretgs per l'aua de Londadusa" ei vegnida copiada da pader Baseli Berther, Muster/Dieni ils 28 da settember 1908 dad ina copia, che sesanflava en mauns da sgr. Vigeli Riedi da Zarcuns. Da quei temps fuva el possessur dalla acla a Flurin Sut.

Quei document consista en sesez ord quater differents documents. La pli veglia part dil document datescha digl onn 1368. Donn ch'igl original ni silmeins ina copia mauncan. Cass cuntrari füss quei il pli vegl document da nies archiv communal. La speranza ch'el vegni aunc zacu nenavon astg'ins buca piarder, existevan tenor la davosa remarca duas copias.

Il secund document datescha digl onn 1517 ed ei atgnamein il document principal. Quei onn ei il cass staus avon dertgira e vegnius tractaus sin fundament dil document vegl da 1367.

Il proxim datum che secatta el document ei igl onn 1664. Quei onn ei il sura document vegnius confirmaus entras il sigil dil cumin dalla Cadi.

Ina ulteriura confirmaziun ei succedida igl onn 1834, medemamein cul sigil dalla Cadi.

## Las persunas el document

Durig Berchter	staus mistral 1513 - 1519, 1522-1525, 1551 e Ladrechter ( cau dalla Ligia Grischa) 1522/23, oriunds da Tujetsch e veva era dretgs a Flurin Sura.
Gion Berchter	salter da Tujetsch 1517, frar dil sura mistral e Ladrechter
Gion Martin Lianascha	
Gion Bundi	Massedur
Gielii Ortschei, Gion Janin, Gion Heyni, Gion Salya	vischins da Camischolas-sura
Jennet Pedrut	messadur e da gliez temps Banner-Meister
Peter vivens e gion fargliuns da Gion Padrut	vischins da Camischolas Sura, nativs da Tujetsch
Avat Johannes II	oriunds da Glion, avat suenter igl assassinat dad avat Jakod de Buchhorn igl onn 1367 entochen 1401. Suenter el suonda igl avat tuatschin Pieder de Pultengia (1402 - 1438).
Junker Heinrich de Pontaningen	da gliez temps 1368 ugau dalla claustra da Mustér
Junker Christophel de Rinkenber	
Junker Ulrich de Pontaningen	
Ulrich de Barlodt (Barlotta)	da gliez temps mistral dalla Cadi. En quei grau ei quei document pli che impurtonts per la historia dil cumin dalla Cadi. Tochen oz valeva sco emprem mistral dalla Cadi Dominus Petrus de Cavorga numnaus l'emprema gada 1371. Iso Müller menziunescha Ulrich Barlotta sco mistral igl onn 1390 (pag. 168).
Gion Burgli hügli	vischin da Camischolas
Rudolph de Rieffen	
Heinrich de Saliangen	
Conradin de Medell	vischin da Tujetsch, derivonts d'ina nobla famiglia aristocrata, 1664 Landschreiber dil cumin e Bunds-Schreiber dalla Ligia Grischa. 1678, igl onn digl assassinat da Clau Maissen, cauligia; frar dad avat Adalbert II de Medell (1655 - 1696)
Gion Chrest Venzin	mistral 1834, oriunds da Rueras
Gion Chrest Monn e Gion Andriu Berther	geraus da Tujetsch 1834
Pieder Anton Latour	buntsstatthalter 1834

Il document dat plinavon perdetga:

Flurin sura fuva in uclaun, vitg habitau. Denton il pli essenzial ei la suandonta remarca el document: „ent Florin sura vid il dutg u fluss che cuorra dadora la baselgia giu". In clar mussament dalla existenza d'ina baselgia, carteivel caplutta, a Flurin Sura.

Denton era Flurin Sut fuva habitau. Aunc entuorn la midada dil davos tschentaner fuvan plirs suloms da casas veseivels. L'existenza dils dus logs numnai sco habitadis confirman medemamein documents da 1456 e 1555.

## **Pertucca il document dall'aua Londadusa**

Vic Hendry

### **Igl ei da suttastrihar**

Il document dall'aua da Londadusa ei da muntada; Tarcisi Hendry, archivari dalla vischnaunca da Tujetsch, ha fatg ina biala scuvretga. Ed igl ei da capir ch'el animescha ils avdents dalla val ed d'autrora dad esser veglients ed allerts sin tut las scartiras veglias e suttametter ellas egl archiv. La copia dalla scartira digl onn 1517 sebase sin in document dils anno 1368. Pader Baseli Berther ha anflau ella en casa da Vigeli Riedi-Curschellas a Zarcuns. Da lezzas uras eis el staus possessur da Flurin sut. Displascheivlamein ha pader Baseli Berther buca schau enzanua in'enzenna dil lungatg original; ins smina denton ch'el hagi translatau neu dil tudestg.

Cumpatg che l'aua da diever (per glied e biestgam) giu da Londadusa ha dau dabia da far. Schi da num che la scartira veglia digl onn 1368 ei vegnida statuida 1517, silsuenter puspei 1664 ed aunc inaga 1834.

Ed igl ei setractau el document da rugalar ils dretgs dall'aua da Londadusa per ils habitadis da Flurin Sura e Flurin Sut e nuotatonmeins da *sclauder* da tals dretgs ils vischins da Camischolas Sura. Ils nums dils contrahents ein digns dad esser savi; il text dil document ei vasts e detagliaus e stediamein repetius. El ei nuota schi levs da capir - aschia en sia entira dimensiun. *Ina* construcziun dil document ei da gronda purtada:

*... «ils hondreivels vischins de Florin sutt e Florin Sura, ils quals han funs ent Florin sura vid il dutg, u fluss che cuorra dadora la baselgia giu... »*

Ei setracta plitost d'ina caplutta che d'ina baselgia. Mo che Flurin Sura ha giu ina caplutta ei ina declaraziun nundetga. Flurin Sura ei staus in habitadi d'impurtonza, da pli gronda impurtonza che igl ulteriur tshupi d'avdonzas encunter sera, sco per semeglia: Valschella, Cascharolas, Cresta, Malamusa Sut, Nurschei e Giuv.

Il frust cun si il clavau ed il claus da gaglinas da Flurin Berther-Valier a Flurin (sco era il prau da Mario Giger, rentaus vidlunder encunter damaun) secloma: «*Il sulom dalla caplutta*». Schia ch'il num ei semantenius!

Ed ussa pervia da quell'aua giu da Londadusa. Las fontaunas ein buca sin las spatlas dalla Londadusa; ellas ein sisum ils praus da Camischolas, a Sumpraus, ual davos la seiv che ha spartiu il funs dalla pastira. L'aua dallas fontaunas (ina gronda fontauna e pliras pli pintgas) sbucca denton giudem la plaunca el vau dil run (dargun) da Londadusa che setegn sin sia cuorsa fetg datier digl Uaul Flurin. Il vau giud la spunda ei pil solit schetgs. Il run daventa prigulus, sch' il dutg grond giudem l' alp Caschlè che rimna ton sco tut las auas dall'alp va surora e dat el run da Londadusa. La plaunca ei teissa ed il terren luc da plattamorta sbova. Ed ina sbuada gronda giu da Londadusa sto esser capitada enteifer ils onns 1368-1517. Ei stat scret ella copia dil document:

*«... , perquei ditg suenter quei seigi ju giu ina bova, ch'els hagian patiu ton e pli gron don, ch'els... »* (manegiau eis ei cheu ch'els - ils vischins da Flurin Sura, hagian pituu pli grond donn ch'els vischins da Camischolas Sura).

Tgei che la bova da Londadusa ha è veramein caschunau - gliez savein nus buc. En mintga cass ein «*Las Muschnas*» (in toc prau sur la lingia da viafier a Flurin) ina perdetga veseivla. E cheu s'ei aunc da metter vitier che Luis Schmid-Berther da Zarcuns hagi onns ora teniu aviert il dutg giudem l'alp Caschlè, sinaquei che l'aua mondi enagiu la Val dil Foss e silsuenter engiu el flum dalla Val Mila. Oz perencunter tegn la *vischnaunca* liber il vau dil dutg giudem l'alp Caschlè.

Las perdetgas dil document che sebase sigl onn 1368 ein tuttavia da gronda purtada. Ei stat scret: «... havein Nus Avad Johannes pendiu Nies agien sigill aviartameing vid questa bref, la qualla ei scritta a Muste sin la Vigielia de S. Martin, gl'on suenter la neschientscha de Nies Segnier tredischtschient a sisonta otg 1368. De quei eran perdetgias Junker Christophel de Rinkenber, Junker Ulrich de Pontaningen, Ulrich de Barlotd da gliez temps Mistral de Disentis, Gion Burgli hügli de Chamischollas, Rudolph de Rieffen, Heinrich de Saliangen, ed auters hondreivels vischins dela Casa da Diu biars ed

deiggia avonda etc.»

*Avat Johannes II da Glion* (1367 - 1401) ei staus in avat indigen, in um cun in spert aviert e cun in grond senn per il svilup democratic. El veva empriu enzatgei dil mazzament digl avat Jacob de Buchhorn (1367) enta Medel. Avat *Thüring d'Attinghausen* (1327 - 1353) ha surviu ad avat Johannes II sco exempel. Cun la Ligia da Glion (1395) ha avat Johannes II preparau la fundaziun dalla Ligia Grischa (1424).

*Mistral Ulrich de Barlotdt*. Schebein Barlotdt ei in num d'in liug u semplamein il fegl dil Barlotdt (Barlotta) ei buca clar. En mintga cass ei Ulrich Barlotdt documentaus pér igl onn 1390. Ils anno 1402 ha mistral Barlotdt cumprau la tuor da Wurtzenstein (de Ragisch) a Chischlatsch, sut Mumpe-Medel, ina tuor che ha s'udiu a Cilia de Pultengia. En la documentaziun dall'aua da Londadusa stat mistral Ulrich Barlotdt sco perdetga; tonca ei era gia lu, igl onn 1368, mistral dalla Cadi. Ed enaquella *sclauda* la scartira il fatg che Dominus Petrus de Cavorgien (1371) seigi staus igl empren mistral dalla Cadi. Per capir onz meglier la situaziun da lezs onns - tucca ei da star eri e mirar anavos. Igl ei fetg da supponer ch'il cumin dalla Cadi cun ses mistrals seigi in bien ton pli vegls che quei che nus savein documentar il di dad oz. Sch'igl Uri da l'autra vart dils cuolms veva gia 1273 in mistral - eis ei bein pusseivel ch'ils cumins en la vallada dil Rein seigien semegliantamein sefatgs, cumins cun mistrals e derschaders. La pezza encunter sera ha maina pudiu retener il regl dalla libertad. Epi ein ils Gualsers vegni sur il Cuolm d' Ursera, els cun lur desideri da sefar libers ed independents. E si dil miezdi ein las ideas liberalas dils Lumbards arrivadas; ils marcaus dalla Lombardia cumandavan sezs lur fiastas. Aschidadir che la fuola ed il catsch ein vegni gronds, silmeins dapi igl onn 1255.

Sfarfatgamein ha l'evla da Habsburga smenau las alas; ils ducas ed ils conts ein seruchegiai vi e neu; els han fatg grondas conquistadas. E ... per cass, bein capiu, ils baruns ed ils cavaliers en Rezia ein buca stai maufers.

### *Ils giunchers*

Dus giunchers ein stai perdetgas ella scartira da 1368. E tgei vul quei dir: *giuncher?* Giuncher ei semplamein «Jungherr» fegl u vegnetsuenter de possessurs da beins feudals dil temps medieval. E nus vein cheu Christophel de Rinckenberg = Ringgenberg che significhescha Zignau. L' auter ei igl Ulrich de Pultengia (ed exponents de Pultengia ein stai: Wilhelm, Clau, Ulrich ed igl avat Pieder).

*Las ulteriuras perdetgas dil document Rudolph de Rieffen* (Ryferis, Ryfaires) ed ins manegia *Rueras*. Igl ei ton sco nunpusseivel da localisar de Rieffen a Raveras sigl ur digl ual dad Acletta ei vitg da Muster. Ei setracta da Rueras, dadens il Dutg grond.

Alluscha gliez bein; il vitg da Rueras stat sin ina ravera (rivera) e schizun sin la malneidiadad d' ina bova. Igl ei buca sclaus ch' ins hagi da lezzas uras fatg diever dil plaid «Rüfe» e pronunziau igl avdant dil liug cun de Rieffen (era rieven ei buca giud via). Nus enconuschein ord las scartiras in Rudolph ed in Martin de Rieffen; Martin ei staus mistral igl onn 1399. Ina caussa denton ei da gronda purtada: Ils representats de Rieffen ein buca stai giunchers; els ein buca stai d'ina famiglia nobla, probablamein possedents ed aschia da pli gronda influenza.

E cheu s'ei da metter vidlunder che las schlatteinas cun *il prefix = presilba «de»*, sco per exempel:

de Florin,

de Curtins,

de Plaz

de Medell (num screts cun dus «ll» per distinguer dalla vischnaunca da Medel)

de Parde

de Pali (Paly)

indicheschien semplamein *il liug da derivonza*. Ellas ein buca da noblezia. Ina suletta excepziun: *de Ragisch*

Il num de Ragisch vegn neu da *Wurtzenstein*, da Chischlatsch, sut Mumpe-Medel. Hans da Wurtzenstein, in ministerial dalla claustra, ei documentaus cun igl onn 1377.

Il Gion Burgli hügli da Chamischollas ei in Gualser, ina documentaziun ch' ils Gualsers ein buca mo stai els habitadis ordvart, biaronz e secasai els plats ed els bials praus d'amiez la val. Heinrich de Saliangen sai jeu buca metter a casa; igl ei meins probabel ch'el seigi da Selvaningen (Selva).